

REGLUGERÐ

um vottaðar viðarumbúðir vara við útflutning.

1. gr.

Markmið.

Markmið reglugerðar þessarar er að tryggja að þær viðarumbúðir sem notaðar eru við útflutning á vörum frá Íslandi uppfylli kröfur innflutningslands og standist kröfur alþjóðlega plöntuheilbrigðisstaðalsins ISPM 15.

2. gr.

Gildissvið.

Reglugerð þessi nær yfir viðarumbúðir s.s. vörubretti, trékassa og annan trjávið sem notaður er til að bera, styðja við eða verja vörur í flutningi þeirra á áfangastað. Undanskildar eru umbúðir sem að öllu leyti eru unnar úr trjáviði sem mótaður er með límingu, hitun og pressun s.s. krossviður, spónaplötur, spónn o.fl. Einnig eru undanskildar viðarafurðir eins og sag, tréhálmur, hefilsþæmir og kurl undir 6 mm á þykkt.

3. gr.

Vottun fyrirtækja.

Fyrirtæki sem óska eftir að hljóta vottun til framleiðslu eða meðhöndlunar á viðarumbúðum til útflutnings skulu sækja um það til Matvælastofnunar. Í umsókninni skal koma fram hvort fyrirtækið hyggist sjálft meðhöndla umbúðirnar á þann hátt sem krafist er, skv. 4. gr. eða framleiða umbúðirnar úr trjáviði sem meðhöndlaður hefur verið á viðurkenndan hátt. Í umsókninni skal lýsa aðstöðu fyrirtækisins til hitameðhöndlunar, afkastagetu og hvernig tryggja megi skýra aðgreiningu á meðhöndluðum og ómeðhöndluðum umbúðum.

Tilgreina skal einn ábyrgðarmann innan hvers fyrirtækis sem tryggja skal að farið sé eftir ákvæðum reglugerðarinnar. Sé farið fram á það skal umsækjandi geta framvísað sönnun þess að umrædd meðhöndlun hafi átt sér stað s.s. með útprentun á hitasírta, vottorði frá erlendum plöntueftirlitsaðila og vörureikningum eða viðurkenndri merkingu á trjávöru.

Vottun er veitt til eins til þriggja ára í senn.

4. gr.

Viðurkennd meðhöndlun.

Einungis er heimilt að nota trjávið án barkar í umbúðir til útflutnings. Hita þarf umbúðirnar eða þann við er nota á til framleiðslu þeirra þannig að hitinn í innsta kjarna nái að lágmarki 56°C og haldist þannig í minnst 30 mínútur.

Varðandi innfluttan við sem nota á í umbúðir er auk hitameðhöndlunar einnig hægt að viðurkenna svælingu með metylbrómíði í þeim löndum þar sem það er leyft ef það er gert í samræmi við þær leiðbeiningar sem lýst er í viðauka I við hinn alþjóðlega staðal ISPM nr. 15, sbr. 8. gr. Einnig er hægt að viðurkenna aðrar aðferðir sé það staðfest af plöntueftirliti innflutningslandsins að sú aðferð sé fullnægjandi.

Leyfilegt er að endurnýta, endurvinna og endurmerkja notað efni úr vottuðum umbúðum til að gera við eða endursmíða umbúðir.

Meðhöndlaðar umbúðir má endurnýta sé engrar viðgerðar þörf. Ef viðgerðar er þörf og endursmíða þarf undir þriðjung umbúðanna er um viðgerðar umbúðir að ræða og þá þarf að merkja nýja efnið með ISO tákni


viðkomandi framleiðanda. Ef meira en þriðjungur efnisins er endurnýjaður er um nýjar umbúðir að ræða og þá þarf að má af gamlar merkingar og endurmerkja með ISO tákni nýs framleiðanda.

Ef vafi leikur á meðhöndlun upprunaefnisins skal það endurmeðhöndlað, því eytt eða annars ekki nýtt undir umbúðir til útflutnings.

5. gr.

Merking.

Viðarumbúðir sem hlotið hafa þá meðferð sem tilgreind er í 4. gr., skulu merktar með eftirfarandi merki:



Táknið vinstra megin í merkinu er tákn hins alþjóðlega sáttmála um plöntuvernd IPPC: „International Plant Protection Convention“.

IS-00: Tveggja stafa ISO tákn fyrir Ísland ásamt útteildu númeri hins vottaða fyrirtækis.

HT: Hitameðhöndlun („Heat Treatment“) í 56°C í kjarna viðar í 30 mínútur.

Önnur tákn í neðri línu merkisins gætu verið: DH = rafhitað („Dielectric heating“), MB: metýlbrómíð-meðhöndlað eða SF: brennisteinsflúoríð („Sulphuryl fluoride“).

Merkið skal setja á tvær gagnstæðar hliðar umbúðanna með brennimerki, stimplun, málun eða sprautun. Nota skal vatnshelda málningu í öðrum litum en rauðum og rauðgulum. Merkið skal vera vel læsilegt.

6. gr.

Eftirlit.

Matvælastofnun hefur eftirlit með að ákvæðum reglugerðarinnar sé framfylgt. Fyrirtæki sem vottun hafa hlotið skulu framvísa til Matvælastofnunar upplýsingum um viðskipti með viðarumbúðir eða trjávöru til framleiðslu þeirra sé þess óskað ásamt upplýsingum um hitameðhöndlun.

Skylt er að tilkynna Matvælastofnun verði breytingar á aðstöðu fyrirtækisins og möguleikum til að meðhöndla umbúðirnar á fullnægjandi hátt.

Einungis þeim sem hlotið hafa vottun Matvælastofnunar, sbr. 3. gr. er heimilt að merkja viðarumbúðir sínar í samræmi við 5. gr.

7. gr.

Afturköllun vottunar.

Matvælastofnun getur afturkallað vottun sé ekki farið að reglum um hitameðhöndlun og merkingar og þess eigi gætt að vel sé aðgreint milli meðhöndlaðra og ómeðhöndlaðra umbúða. Slíkri ákvörðun má skjóta til úrskurðar ráðuneytisins.

8. gr.

Gjaldtaka.

Matvælastofnun innheimtir tímagjald skv. gjaldskrá stofnunarinnar fyrir vottun til framleiðslu og meðhöndlunar á viðarumbúðum til útflutnings, viði til umbúðagerðar og vegna kostnaðar við eftirlit með að

ákvæðum reglugerðar þessarar sé fylgt og einnig ef útflytjandi óskar eftir plöntuheilbrigðisvottorði með einstökum sendingum.

9. gr.

Gildistaka o.fl.

Reglugerð þessi er sett samkvæmt ákvæðum 2. og 3. gr. laga um varnir gegn sjúkdómum og meindýrum á plöntum, nr. 51/1981, og öðlast þegar gildi. Þá er felld brott reglugerð um viðarumbúðir vara við útflutning, nr. 343/2004. Stuðst er við hinn alþjóðlega plöntuverndarstaðal ISPM nr. 15 er gefinn var út á vegum Matvælastofnunar Sameinuðu þjóðanna (FAO) árið 2019, „Regulation of wood packaging material in international trade.“

Atvinnuvegaráðuneytinu, 17. apríl 2026.

Hanna Katrín Friðriksson.

Elisabet Anna Jónsdóttir.

B deild - Útgáfudagur: 7. maí 2026